

# 1 Tesalonicenses

**1** Chaa hõjts hädaa nocy nhädiuunmuga'añ, hõõch Pablo, mõödä Silvano, mõödä Timoteo. Mijts hädaa nocy nyajnäjaayøøby, pønhatiä Diosmädia'agy jim mäbøjp Tesalónica. Mwiingudsähgøøbiä Diosteedy hajxy mõödä Jesucristo, ja'a hajxy nWiindsøn'hájtämbä. Tu'ugmädia'agy hajxy mmøødhity. Weenä Dios ja'a hoyhajtä weenhajt hajxy xmiø'oy mõödä Jesucristo.

<sup>2-3</sup>Tehngajnä hõjtsä Dios nnäma'ay “Dioscujú'uyäp” ja'a mijtsçxpä nägøxiä. Jaanä mijtsçxpä hõjtsä Diosteedy nmänuu'xta'agy tehngajnä. Jaduhñ hõjtsä Dios nnäma'ay coo mijtsä miädia'agy hamuumdu'joot mmäbøjcä, paady hajxy hoy mjaançh tehñ quiudiuunä. Paady hajxy jaduhñ mgudiun, coo ja'a Dios hajxy mjaançh tehñ chocy. Coø ja'a Jesucristo hajxy hamuumdu'joot mjøbhixy, paady hajxy nägøø nädecypiä mmee'xtucy. <sup>4</sup>Mägu'ughajpädøjc, xchojpa Dios hajxy jaduhñ. Nnajuøøby hõjts jaduhñ coo ja'a Dios hajxy tøø xwyiimbiy. <sup>5</sup>Hix, coo hõjts mijts nyajwiingapxøøyy coo ja'a Jesucristo hajxy tøø

xñähho'túutäm, ja'a Dioshëpíritu hõjtsä mäjaa hänajty xmiøoby. Cab hõjts hänajty nä'ä nägoobä nnä'ä capxy nnä'ä mädia'agy. Coø hõjtsä mäjaa jaduhñ xmiøoyy, paady hõjts hänajty nnajuø'øyy cooçhä tøyhajt hänajty nyecy. Mänaa hõjts jim nhitiän maa mijtsän, hoy hõjts jim nhijty. Paady hõjts jaduhñ hoy nhijty coo hõjts mijts hänajty jaduhñ hoy ween xpiahity. Mjahmiejchp hajxy jaduhñ, túhmäts.

<sup>6</sup>Jaduhñ hõjts mijts hoy xjiaançh pahity. Jaduhñä Wiindsøn Jesucristo hajxy hoy tøø mbahijxpä. Yajxonä mädia'agy hajxy jaduhñ mmädooyy, ja'a hõjts mijts nyajwiingapxøøyyäbä ja'a Jesucristoçxpä, ja'a hõjtsä Dios xñajtsçapxøøyyäbä. Mxoonädaac hajxy jaduhñ coo hajxy jaduhñ mmädooyy, hoy hajxy hänajty jaduhñ hanaxiä mja tsaachpøcy. Ja'a Dios hajxy jaduhñ xyajxonädaac. <sup>7</sup>Coo ja'a Diosmädia'agy hajxy tøø mmäbøcy, hoy hajxy hänajty mja tsaachpøcy, paadiä mäbøjpädøjc-hajxy hoy miäbøjpa nägøxiä, ja'a hajxy jim tsänaabiä maa ja'a naax xiøhatiän Macedonia

møød Acaya. <sup>8</sup>Ca'a jyimiähajtiä ja'a Diosmädia'agy jaduñ tøø wia'xy ja'a Jesucristocøxpä. Wiinduhmyhagajpt jaduñ wia'xnä. Jaanä jaduñnä mädia'agy wia'xpä wiinduhmyhagajpt coo mijtsä Diosmädia'agy mmäbøjtsoñ. Coo ja'a mäbøjpädøjc-hajxy jaduñ tøø miädoyhajnä, paady højts jaduñ nga'a nägapxy. <sup>9</sup>Hix, majaty højts nwädity, jaduñ højtsä mäbøjpädøjc xñama'ay coog højts mijts hoy yaxón xyajtøjtägøøyy mänaa højts jim nhoyän maa mijtsän, møød coogä quepychechä naaxpoch hajxy tøø mnajtshixøñä. Páadiäc hajxy tøø mnajtshixø'oy coogä Dios hajxy mwiingudsähgøøñä, møød coogä Diosmädia'agy hajxy hamuumdu'joot myajtuunnä. Tøyhajtä Dios jiujuqiä. Cabä quepychechä naaxpoch jiujuqiä. <sup>10</sup>Møød jaduñ hajxy miänaambä cooc mijtsä Dioshuung Jesucristo hajxy mjøbhixy coo yaa quiädaactägatsa'añ hädaa yaabä naaxwiin. Tsajpootyp chohnda'aga'añ coo hänajty yaa miänaca'añ. Coo ja'a Jesucristo hänajty tøø yho'ogy, mänit yagjujypjøjcä ja'a Tieedy. Mänit jim ñøcxy tsajpootyp. Ja'a Jesucristo hajxy jaduñ xyajñhwa'adsaanäm coo ja'a haxøøgjaya'ayhajxy hänajty yajcumädowa'añii ja'a Dios.

**2** <sup>1-2</sup>Mägu'ughajpädøjc, coo højts jim nhooyy Filipos Diosmädia'agy-yajwa'xpä, mänit højtsä jäya'ay jim xxiøøghajty. Høxtä xhaačhtiuun højts jaduñ. Pero coo højts mänitiä nnøcxy maa mijtsän, mänit højtsä Dios xjiootcapxmøcøjcy,

hoy højtsä jäya'ay hänajty xjiaanč tehñ miädsiphaty. Y coo højts mijtsä Diosmädia'agy nyajwiingapxøøyy, mänit hajxy mmäbøjcy hamuumdu'joot. Tøyhajt jaduñ, túhmäts. Coo højtsä Dios xpiuhbety, paady højtsä miädia'agy hamøj jootmøj nyajwa'xä.

<sup>3</sup>Tøyhajtä Diosmädia'agy jaduñ. Hamuumdu'joot højts nyajwa'xy. Cab højts nhøhnda'agy. <sup>4</sup>Haa ca'a, ja'a Dios højts xwyiinguejx Diosmädia'agy-yajwa'xpä, paady højts hamuumdu'joot nyajwa'xy ca'xy pedyii. Cab højts nyajtägach ni weeñtiä. Ja'a Dios højts xquiumaayy. Jaduñ højtsä njoot chocy coo højts xquiumáyät. Cab højts nmøjpäda'agy pø cab højtsä cu'ug xquiumay. Hix, jaduñnä Dios hajxy xñajuøøyyäm neby hajxy nwiinmahñdhajtäm. <sup>5</sup>Mänaa højts jim nhoyän maa mijtsän, cab højts mijts hänajty nwiinhøøna'añ. Jii jäya'ayhajxy näje'e, yaxón hajxy miäwiinhøøñ je'eguiøxp coo hajxy yajcumaya'añ. Pero højts, cab højts jaduñ mänaa njatcø'oy. Ni cab højtsä xädø'ñ mänaa nhadsocy. Jii jäya'ayhajxy näje'ebä, yaxón hajxy miäwiinhøøñ, weenä xädø'ñ hajxy jaduñ mio'oyii. Pero højts, cab højts jaduñ njatcø'oy. Tøyhajt jaduñ. Xñajuøøbiøchä Dios jaduñ cooch nga'a høhnda'agy. <sup>6</sup>Cab højts jaduñ nmäna'añ coo højts pøn xwyiingudsähgø'owät, ni mijts ni pøn, hoy jaduñ jia hawiinmatsä coo højts cu xwyiingudsähgøøyy, je'eguiøxpä coo højtsä Jesucristo tøø xwyiinguexy. <sup>7</sup>Pero nnäxuu'chp højts mijts. Mijtsøxpä højtsä hojoot nmøødhaty. Høxtahñdsä

tajjaya'ay ja'a yhuung hajxy cwieendähaty, jaduñ hõjts mijts ngüeendähajpä. <sup>8</sup>Njaanč tehñ chojpy hõjts mijts, paady hõjts mijtsä Diosmädia'agy hoy nyajwiingapxø'øy. Hõxtä cu nnähho'tuuty hõjts mijts coo ja'a Dios jaduñ cu miänaañ. Hix, hoyhoy hõjts mijts ndsocy nba'häyoy nägø'ø nädecypä. <sup>9</sup>Mägu'ughajpädøjc, mänaa hõjts mijtsä Diosmädia'agy hoy nyajwiingapxø'øyän, nnajuøøby hõjts hänajty coo mijtsä xädø'øñ hänajty may mga'a møødä. Paady hõjts hänajty møc nduñ nxajy xøømdsuhñ. Mjahmiech hajxy jaduñ, túhmäts. Ja'a nhamdsoo caayyøøc hõjts hänajty nguduumbly nguxajpy. Cab hõjts hänajty nmäna'añ coo hõjts mijtsä caayyøøc xñä'a mó'owät.

<sup>10</sup>Mägu'ughajpädøjc, hoy hõjts jim nwädijty maa mijtsän. Cab hõjts jim nmee'ch nbojty. Cab hõjts jim nduundägooyy nnajxtägooyy. Ni weeñtiä hõjts jim nga'a cädiehy. Tøyhajt jaduñ, túhmäts. Jaduñ hõjtsä Dios xñajuøøbiä coo tiøyyä. <sup>11</sup>Hõxtahñdsä teedyjäya'ayä yhuung hajxy jiootcapxmøcpøcy, jaanä jaduñ hõjts mijts njootcapxmøcpøjpä. Tøyhajt jaduñ, túhmäts. Jaduñ mijts nmägapx nhanehbä coo hajxy hoy yajxon mjäya'ayhädät. <sup>12</sup>Jaduñä Dios jioot chocy. Coo hajxy jaduñ hoy yajxon njäya'ayhajtämät, paadiä Dios hajxy jim xyajncxáanäm tsajpootyp maa miähane'emiän, maa wyiingudsähgø'øyijän.

<sup>13</sup>Paady hõjtsä Dios tehngajnä nnäma'ay "Dioscujú'uyäp." Hix,

coo hõjts mijtsä Diosmädia'agy hoy nyajwiingapxø'øy, mänit hajxy hamuumdu'joot mguhbøjcy. Jaduñ hajxy mmäbøjcy coo jiaanč Diosmädia'aguiä. Cab hajxy mmänaañ cooc tyijy jäya'ay tøø yhädiuñ. Tøyhajt jaduñ coo ja'a Dios tøø yhädiuñ. Y coo hajxy jaduñ mmäbøcy, paady hajxy hoy mjäya'ayhajnä. <sup>14</sup>Mägu'ughajpädøjc, coo ja'a mhamdsoo mägunaax hajxy xchaačhtiuuñ, ja'a judíos hajxy, jaduñ hajxy mjajt mhabejpä nebiä mæbøjpädøjc-hajxy jim chaačhpøquiän Judea-naaxooty, ja'a hajxy mæbøjpä ja'a Diosmädia'agy møødä Jesucristo miädia'agy. Jaduñ hajxy chaačhtiuunäbä ja'a yhamdsoo mägunaaxhajxy, ja'a judíos hajxy. <sup>15</sup>Coo ja'a Wiindsøn Jesucristo yagho'cä, ja'a judíos hajxy jaduñ jatcøøyy. Jaduñä judíos ja'a profetadøjc hajxy jecy yagho'pä. Hõjtspaadiä judíos xjiaac hadsaačhtiuunnajxpä. Coo ja'a judíos hajxy jaduñ haxøøg yhäna'c-haty, paady hajxy quia'a cumayii ja'a Dios. Hoy piønä hajxy jaduñ miädsiphaty. <sup>16</sup>Hix, coo hõjtsä jäya'ayä Diosmädia'agy hänajty nyajmøødmädia'agy, ja'a hajxy ca'a judiøspä, ween hajxy jaduñ ñähwaats quihwaatspä, mänit hõjtsä judíos hänajty xjia wi'i yhaduga'añ. Coo ja'a judíos hajxy jaduñ jiatcø'øy, tehngajnä hajxy hanaxiä haxøøg jiaac tehñ jiatcø'øy. Pero mobädajpä hajxy hoyhoy yajcumädowa'añii ja'a Dios.

<sup>17-18</sup>Hoorä, mägu'ughajpädøjc, coo hõjts jim nhooyy maa mijtsän, mänit hõjts jim nwiimbjcumä. Mänit hõjts yaa nmänajcy. Pero

cab hõjts hijty yaa njega'añ. Ja wi'i ñõcxtägatsaamb hõjts jim jadähooc maa mijtsän. Hix, jaduñ hõjts mijts njuø'øy nebiä hamdsoo huungpä. Hoy miänaajä mijts njahmiejsta'agy, hoy hajxy nga'a ja niyhíxäm hajujcy. Høøch Pablo, mayhóoc-høch jim tøø nja wi'i ñõcxtägatsa'añ, pero cab hõjtsä møjcu'ugong tøø xyajnäbaadøyyä coo hõjts jim nnõcxtägätsät. <sup>19-20</sup>Haa ja'a Jesucristo, ja'a hajxy nWiindsøn'hájtämbä, coo je'e yaa quiädaactägätsät hädaa yaabä naaxwiin, mänit hajxy hänäjty mgähxø'øga'añ maa wyiinduumän coo ja'a Diosmädia'agy hajxy hänäjty hamuumdu'joot tøø mmäbøcy. Paady hõjts njøbhixy coo ja'a Jesucristo yaa quiädaactägatsa'añ. Mänit hõjts jaduñ nxoonda'aga'añ nägø'ø nädecypä ja'a mijtscoxpä. Mänit hõjtsä Dios xquiumaya'añ je'eguiøxp coo ja'a miädia'agy hajxy hoy mgudiuunä mänaabä hõjts mijts hoy nyajwiingapxø'øyän.

**3** <sup>1-3</sup>Coo hõjts jaduñ nmädoyhajty coog hajxy hijty mjaanč tehñ chaächpøcy, mänítøch njaanč tehñ jootmayhajtøjcy je'eguiøxp coo hõjts hänäjty nga'a najuø'øy pø mjøjtänaabiä møjcu'ugong hajxy hänäjty. Páadyhøchä njoot hänäjty jiaanč tehñ chocy coo hõjts jim nnõcxät maa mijtsän, nmäyajtøwáambiøch mijts hänäjty pø hoy hajxy hänäjty mmee'xtucy. Pero cab hänäjty näbaadø'øwa'añ coo hõjts jim nnõcxät. Mänítøch jaduñ nwiinmahñdyhajty coo hõjtsä hermano Timoteo jim

nguéxät nidiuhñ, y coo hõjts jim nidiuhñ nmähmø'øwät Atenas. Näguipxy hõjtsä hermano Timoteo xmiøødtuñ Diosmoonsä maa hõjtsä Diosmädia'agy nyajwa'xiän ja'a Jesucristocøxpä. Páadyhøchä hermano Timoteo jim nguejxy maa mijtsän coo mijts jaduñ xjiotcapxmøcpøgät maa hajxy hänäjty mdsaačhpøquiän, weenä Diosmädia'agy hajxy hänäjty jaduñ maas hoy mmäbøcy hamuumdu'joot, møød ween hajxy hänäjty jaduñ mga'a jootmayhaty. Hix, ja'a Dios hajxy jaduñ tøø xyajnähdíjjäm coo hajxy jaduñ ndsaačhpøjcämät ja'a Jesucristocøxpä. Tøyhajt jaduñ, túhmäts. <sup>4</sup>Haa ca'a, mänaa hõjts jim nhoyyän maa mijtsän, mänit hajxy nhawáanäm coo hajxy hänäjty tsipcøxp ndsaačhpøgäänäm. Jaduñ hajxy tøø njaanč jajt tøø njaanč habéjtäm, túhmäts. <sup>5</sup>Hoorä, coo hõjts hänäjty nga'a najuø'øy pø hoyyä møjcu'ugong hänäjty mjøjtäna'ay maa hajxy hänäjty xjia wi'i jijøcapxø'øyän, mänítøch jaduñ nja mänaañ coo hõjts jim nnõcxät maa mijtsän. Pero coo hänäjty quia'a näbaadø'øwa'añ coo hõjts jim nnõcxät høøch, páadyhøchä hermano Timoteo jim nguejxy, ween mijts jaduñ xmiäyajtø pø hoyyä møjcu'ugong hajxy hänäjty tøø mjøjtäna'ay, pø hoyyä Diosmädia'agy hajxy hänäjty mbanøcxyñä. Hix, ndsähgøøbiøch hänäjty coo ja'a møjcu'ugong hajxy hänäjty tøø xjiøjcapxø'øy. Coo hajxy häxøpy tøø mga'a mee'xtucy, xiøøbä hõjts mijtsä Diosmädia'agy häxøpy hoy tøø nyajwiingapxø'øy.

<sup>6</sup>Coo ja'a Timoteo jim jiaančh hooy maa mijtsän, mänit wyiimbjicumbä. Hoy yaa miejtstägach maa hõjtsän. Mänit hõjts xyhawaanä coogä Diosmädia'agy hajxy tehngajnä mmäbøcy hamuumdu'joot, møød coog hajxy hamiñ haxøpy mničhogyii. Hoxioondaacnä jaduhñ. Jaduhñä Timoteo miänaambä cóogøch mijts hoy miänaajä xjahmiejtsta'agy, møød cóogøch mijts xchocy xpia'häyoy. Jaduhñägøch mijts xjia wi'i yhixa'añ nébiøch mijts nja wi'i yhixa'añän.

<sup>7</sup>Mägu'ughajpädøjc, coo hõjts jaduhñ nmädoyhajty coogä Diosmädia'agy hajxy hänäjty tehngajnä mmäbøcy hamuumdu'joot, mänit hõjts njootcugøøyy, hoy hõjts hänäjty hanaxiä nja tsaačhpøcy, hoy hõjts hänäjty mõj may nyajmaajiaty. <sup>8</sup>Paady hõjts jootucj nnijiäwøøyyänä coo mijtsä Diosmädia'agy tehngajnä mbanøcxy hamuumdu'joot ja'a Jesucristocøxpä. <sup>9</sup>Coo mijts jaduhñ mmäbøcy tehngajnä, paady hõjts njaančh tehñ xioonda'agy Dioswiinduum, paady hõjtsä Dios hoy miänaajä nnäma'ay "Dioscujú'uyäp."

<sup>10-11</sup>Xøømdsuhñ hõjtsä Diosteedy mba'ya'axy møødä Wiindsøn Jesucristo. Jaduhñ hõjts nmänuu'xta'agy hamuumdu'joot coo hajxy ween yajnabaadø'oy coo hõjts jim nnøcxtägätsät maa mijtsän, jaduhñ hõjts mijtsä Diosmädia'agy njaac yajnahixø'owät nebiaty hajxy pedyii

mga'a mäbøcyñä, <sup>12</sup>møød weenä Jesucristo hajxy xjiaac puhbety coo hajxy hamuumdu'joot mjaac ničhogø'jät hamiñ haxøpy neby hõjts mijts ndsoquiän, møød coo jäya'ay hajxy jaduhñ nägøxiä mdsoc mba'häyowät, <sup>13</sup>møød weenä Jesucristo hajxy xjiaac puhbety coo ja'a Diosmädia'agy hajxy hamuumdu'joot mbanøcxät, møød coo hajxy mga'a najtshixø'owät, møød coo hajxy mga'a wädität haxøøg, jaduhñ hajxy mhídät hawa'adstuum, jaduhñ hajxy põñ xquia'a nähwaambédät maa ja'a Diosteedy wyiinduumän coo ja'a Wiindsøn Jesucristo hänäjty yaa tøø quiädaactägach hädaa yaabä naaxwiin. Näguipxiä Jesucristo ja'a mioonsä hänäjty nägøxiä miøødcäda'aga'añ møød põnjatiä Diosmädia'agy hänäjty tøø miäbøcy.

**4** Hoorä mägu'ughajpädøjc, ja'a Jesucristocøxpä hõjts mijts cham nmägapxy nhane'emy coo hajxy hoy mjaac tehñ jiäya'ayhädät, jaduhñä Dios hajxy xquiumáyät. Jaduhñ hõjts mijts jayøbajt nyajnahixøøyy. Y jaduhñ hajxy hoy mjaančh jäya'ayhaty.

<sup>2</sup>Jaduhñ hõjtsä Wiindsøn Jesucristo tøø xñajtsapxø'øcy coo hõjts mijts nyajwiingapxø'owät, túhmäts. <sup>3</sup>Jaduhñä Dios hajxy xyajmädsøjcäm coo hajxy hoy ngudiúunämät nebiaty hajxy tøø xyhanéhñäm coo hajxy hoy nwädjítämät, møød coo ja'a haxøøgwiinmahñdy hajxy ngøxy najtshixøøyyämät. <sup>4</sup>Jaaná jaduhñä Dios hajxy tøø xyhanéhñämbä coo ja'a ndo'oxiøjc hajxy hoy yajxon nmøødtsänáyyämät, møød coo

hajxy nwiingudsähgöøyyämät.

<sup>5</sup>Haa ja'a jäya'ayä Dios hajxy ca'a hixyhajpnä, cabä miädia'agy hajxy jaduhñ quiudiuunä. Hix, wiingto'oxiøjc hajxy wyl'i yhadsojpy. Pero mijts, ca'a hajxy jaduhñ mbajatcø'øy. <sup>6</sup>Ca'a mmäjøøn mmädøjcä tio'oxiøjc hajxy jaduhñ mmägapxtägooyyä. Pønjaty jaduhñ jatcøøby, tsipcøxp hajxy hoyhoy yajcumädowa'añii ja'a Jesucristo. Haa ca'a, jaduhñ højts mijts tøø nhuuc hanehmbä. <sup>7</sup>Hix, jaduhñä Dios hajxy tøø xyajnähdijjäm coo hajxy hoy yajxon' njäya'ayhätämät. Cab hajxy jaduhñ xyajmädsøjcäm coo hajxy haxøøg nwädijtämät. <sup>8</sup>Jaduhñds je'e, paadiä Dios ja'a yhEspíritu tøø xmióoyyäm, jaduhñ hajxy hoy njäya'ayhätämät. Pønjaty jaduhñ ca'a cudiunaamb nébiøch chamñ nmädia'aguiän, ja'a Dios hajxy jaduhñ ñägädieeyøøby, ca'a jäya'ayä.

<sup>9</sup>Mägu'ughajpädøjc, ja'a Dios hajxy jaduhñ tøø xyajnähixøøyyäm coo hajxy hamiñ haxøpy nniçhøjcämät, pønjatia Diosmädia'agy mäbøjp. Hoorä, coo ja'a Dios hajxy jaduhñ tøø xyajnähixøøyyäm, cab yhadsipä cooçh mijts jaduhñ njaac yajnäjaayø'øwät coo hajxy jaduhñ nniçhøjcämät. <sup>10</sup>Tøyhajt jaduhñ coo ja'a mäbøjpädøjc hajxy nägøxiä mdsocy yaa Macedonia-naaxooty wiinduhmyhagajpt. Jaduhñ højts mijts mäbøcy nmänuu'xta'agy coo hajxy maas hamuumdu'joot mmädsögät. <sup>11</sup>Jaduhñ højts mijts tøø nhuuc hanehmbä coo hajxy hamoñ haducy mhídät, coo hajxy mga'a yajtägø'øwät maa cueendä

hajxy mga'a møødän, møød coo hajxy mniiyhix' mnimiähäyowøøjtät hamdsoohaamby. Jaduhñä mjoot hajxy mbädá'agät coo hajxy jaduhñ mgudiúnät, <sup>12</sup>jaduhñä cu'ug hajxy xquiumáyät, møød jaduhñ hajxy tii mga'a yajmaajiädät.

<sup>13</sup>Mägu'ughajpädøjc, ja'a jäya'ayhajxy ca'a mäbøjpä, coo ja'a jiuju ja'a miägu'ug hajxy yho'ogy tiägoy, mänit hajxy jiaançh tehñ jiootmayhaty. Paady hajxy jaduhñ jiootmayhaty coo hajxy quia'a najuø'øy coo ja'a Dios ja'a ho'oguiäya'ay yagjujypiøjtägatsa'añ, ja'a hajxy hänajty tøø miäbøquiäbä. Paady højts mijts chamñ nhawáanäm, cab højtsä njoot chocy coo hajxy mjootmayhápät. <sup>14</sup>Hoorä, coo hajxy jaduhñ nmäbøjcäm coo ja'a Jesucristo jiujypiøjtägajch mänaabä hänajty tøø yho'oguiän, paady hajxy jaduhñ nmäbøjcämbä coo ja'a Dios ja'a ho'oguiäya'ay yagjujypiøjtägatsa'añ, ja'a hajxy hänajty tøø miäbøquiäbä ja'a Jesucristocøxpä, ja'a Jesucristo hajxy møødhijpä tu'ugmädia'agy.

<sup>15-17</sup>Hädaa mädia'agy jaduhñmbä, ja'a Jesucristøch jaduhñ xñajtscapxøøyyä. Hoorä, coo ja'a Jesucristo hänajty yaa quiädaactägatsa'añ hädaa yaabä naaxwiin, mänit jim choona'añ tsajpootyp. Mänit møc ya'axa'añ nebiä soldadowiindsøn'hajxy møc ya'axiän coo hajxy hänajty chiptuna'añ. Mänitä Diosmoonsä møc ya'axaambä, ja'a møjtuung jim møødpä tsajpootyp. Mänitä Dios ja'a xiuuxt yajxu'uxa'añii møc. Mänitä ho'oguiäya'ayhajxy jiujypiøga'añ, ja'a hajxy hänajty tøø

miäbóquiäbä ja'a Jesucristocøxpä. Mänitä mäbøjpädøjc-hajxy nägøxiä chajpeda'añ, pønjaty hänäjty jujyñä tsuxnä, näguipxy møød pønjaty hänäjty tøø yho'ogy, ja'a hajxy hänäjty tøø jiuypiojtägáchäbä. Mänitä Jesucristo hajxy nägøxiä nøcxy njøjcubaadø'owáanäm jim jocjooty, møød pønjaty hänäjty tøø jiuypiojtägach, møød pønjaty hänäjty jujyñä tsuxnä. Hoy miänaajä ja'a Jesucristo hajxy nägøxiä xmiøødhidáanäm. Cab hajxy mänaa xpiuhwa'adsáanäm.

<sup>18</sup>Tøyhajt hädaa mädia'agy jaduhñ. Coö hajxy jaduhñ mmäbøcy, jaduhñ hajxy hamiñ haxøpy mnijootcapxmøcpøgøójät.

**5** <sup>1-2</sup>Mägu'ughajpädøjc, mnajuøøby hajxy jaduhñ coö jaduhñ quia'a yajnajuø'oy mänaa xøø tiempo yhabaada'añ coö ja'a Jesucristo yaa quiädaactägatsa'añ hädaa yaabä naaxwiin. Paady, cab yhadsipä coöch mijts njaac yajnäjaayø'owät mänaa jaduhñ jiada'añii. Pero jaduhñ mäbøcy, mnajuøøby hajxy jaduhñ coö ja'a Jesucristo hajxy xyajcädaacpedáanäm jaguiapxy jamiädia'agy. <sup>3</sup>Jaduhñä cu'ughajxy hänäjty miäna'ana'añ: "Jootcujc hajxy nhíjtäm; cab hajxy nej njadáanäm, cab hajxy nej nhabetáanäm", nøm. Mänitä tsø'ty häyohn jaguiapxy jamiädia'agy yhabaada'añ. Paquiä cu'ughajxy jaduhñ jiada'añii tiuna'añii jaduhñ mäwiin nebiä to'oxiojc-hajxy jiaty yhabetiän coö ja'a yhuunghajxy hänäjty myina'añ quia'awa'añ. Cabä cu'ughajxy hänäjty hoy piäyø'oga'añ. <sup>4</sup>Pero mijts,

mägu'ughajpädøjc, mwiiñjuøøby hajxy jaduhñ. Cab hajxy jaduhñ myagjuø'owa'añ coö ja'a Jesucristo hajxy jaduhñ xyajcädaacpéjtämät jaguiapxy jamiädia'agy. <sup>5</sup>Hix, coö ja'a Diosmädia'agy hajxy nmäbøjcäm ja'a Jesucristocøxpä, paady hajxy jaduhñ mäwiin nmäbáatäm nebiä jäya'ayhajxy xøøm wädiipän. Hoy hajxy yhixy. Cab hajxy nhíjtäm hagoodstuum. <sup>6-8</sup>Coö hajxy jaduhñ nmäbøjcäm ja'a Jesucristocøxpä, tsøcxä hajxy híjtäm nähix hahixø'ø. Tsøc hajxy híjtäm wijy quejy. Jaduhñ hajxy nga'a híjtämät nebiä jäya'ay maabän, nebiä jäya'ay múucäbän. Jaduhñä haxøøgpä hajxy hoy njøjtänäayyämät nebiä soldadohajxy chiptuñän nähbujxt cuhbujxt. Tsøcxä Diosmädia'agy hajxy hamuumdu'joot mäbøjcäm. Tsøgä jäya'ay hajxy nägøxiä tsojc pa'häyóowäm. Tsøgä Jesucristo hajxy jøbhíjxäm coö hajxy xyajnáhwa'ads xyajcuhwa'adsáanäm. <sup>9</sup>Hix, cabä Dios hajxy xyajmädsójcämät. Caj pues. Jaduhñ hajxy tøø xyajnáhdíjjäm coö ja'a Wiindsón Jesucristo hajxy xyajnáhwaats xyajcuhwáatsämät. <sup>10</sup>Paady hajxy hoy xñähho'túütäm, jaduhñ hajxy hoy xmiøødhidáanäm cøjxta'axiøø. Coö yaa quiädaactägatsa'añ hädaa yaabä naaxwiin, mänit hajxy nägøxiä xwiowø'ogáanäm, møød pønjaty hänäjty jujyñä tsuxnä, møød pønjaty hänäjty tøø yho'ogy tøø tiägoy. <sup>11</sup>Hoorä, jaac nijootcapxmøcpøgøø hajxy hamiñ haxøpy. Jaac niyajnáhixø'owøø ja'a

Diosmädia'agy hajxy. Jaduhñ hajxy jäda'ahaty mjaančh cudiuñ.

<sup>12</sup>Mägu'ughajpädøjc, mijts nmänuu'xtaacy py coo ja'a wiindsøndøjc hajxy mwiingudsähgø'owät, ja'a hajxy jim tuumbä maa ja'a Diostøjcän, ja'a mijts xwyiingapx xjijøcaxø'obiä. <sup>13</sup>Coo hajxy jaduhñ tiuñ, paady hajxy hamuumdu'joot mdsoc mba'häyowät. Jootcuje hajxy mnimiødhidø'jät. Cab hajxy mnimiä'jootma'ad mnimiädsiphadø'jät.

<sup>14</sup>Mägu'ughajpädøjc, jaduhñ mijts njaac yajwiinxiic njaac yajwiingapxø'oy coo häna'c hajxy mhøjät, ja'a hajxy naxy nuuxho'pä, coo hajxy ween tiuñ; møød coo häna'c hajxy mjootcapxmøcpø'gät, ja'a hajxy jootmayhajpä; møød coo häna'c hajxy mwiingapx mjøcaxø'owät, ja'a hajxy hoy ca'a mäbøgaambä. Mee'xxieemy hajxy jaduhñ nägøxiä mmägaxp mhané'emät.

<sup>15</sup>Mniyajcøpø'owø'jöp hajxy. Coo pøn nägädieeyø'owø'jät, cab yaghawiimbídät. Jaduhñä mjoot hajxy hoy miänaajä mbädá'agät coo mayhajt hajxy mduñhajtät hoy ñä'a pønä, møødä mäbøjpädøjc-hajxy, møødä cu'ughajxy nägøxiä.

<sup>16</sup>Hoy ñä'a mänaajä hajxy mxoondá'agät. <sup>17</sup>Tehngajnä Dios hajxy mba'yá'axät. <sup>18</sup>Mnäám'awäbä Dios hajxy "Dioscujú'uyäp", hoy hajxy nej cu mja jat cu mja habet. Chojiä Dios joot jaduhñ coo hajxy jaduhñ ngudiúunämät, je'eguiøxp coo ja'a miädia'agy

hajxy nmäbøjcäm ja'a Wiindsøn Jesucristocøxpä.

<sup>19</sup>Cabä Dioshespíritu hajxy mänaa mhadúgät. <sup>20</sup>Cab hajxy mbéxät pønjiatiä Diosmädia'agy najtscapxø'oby. <sup>21</sup>Pero cóxäbä mädia'agy hajxy mmädoomach mädyii hoy mädyii mäbaad. Je'eds hajxy mguhbø'gäp hamuumdu'joot. <sup>22</sup>Møødä haxøø'gjootä haxøø'gwiinmahñdy hajxy mgøxy najtshixø'owät.

<sup>23</sup>Ja'a Dios ja'a hoyhajtä weenhajt hajxy xmióoyyäm. Ween hajxy xquiøxy yajnähwa'ačh xquiøxy yajcuhwa'ačh. Ween hajxy xyaghity hawa'adstuum, møødä mjuøhñdyhajxy, møødä mni'xä mgøpc-hajxy, høxtä coonä ja'a Wiindsøn Jesucristo yaa quiädaactägätsät hädaa yaabä naaxwiin. <sup>24</sup>Ja'a Dios hajxy tøø xwyiimbiiwäm. Jaaya'ay hajxy tsipcøxp xyajnähwa'ads xyajcuhwa'adsaanäm neby hajxy tøø xyajwiinwaanø'oyyäm. Tøyhajt jaduhñ. Hiñ, cabä Dios mänaa yhøhnda'agy.

<sup>25</sup>Mägu'ughajpädøjc, huuc Diospa'ya'ax hajxy tehngajnä ja'a højtscøxpä.

<sup>26</sup>Huuc näma'aw ja'a mäbøjpädøjc hajxy jaduhñ nägøxiä coo højts hamuumdu'joot ndsocy nba'häyoy.

<sup>27</sup>Nañiä mäbøjpädøjc hädaa nocy hajxy mdehm yajwiingapxø'owät nägøxiä. Ja'a Jesucristo jaduhñ hanehm.

<sup>28</sup>Ween mijtsä Wiindsøn Jesucristo ja'a hoyhajtä weenhajt mõj may xmio'oy. Amén.